

## هذا نداءُ محبيكا بالروح سيدي نفديكا

يحسين حبك للمحب أصبح أمانة  
من لهب نيران اللظا حرز وضمانة  
وأنته اللي لو كل الكدر باجر علانه  
تتجينا من هول القيامة يا ضيا العين  
والله يبو السجاد حبك ما نعوفه  
لو عسكر ابن زياد يرجع وي ألوفه

## يا من غدى الكونُ يبكي بالروح سيدي نفديكا

إنته الحياة ودونك إنعيش المنية  
شهو الحياة إبلا وجودك يا شفية  
والظلمة ما يجليها بس شمس مضية  
والشمس يمك مظلمة يالغالي يحسين  
حق المحب لك يالحبيب إيفوض أمره  
وحقه لون يهدي إلك يالوالي عمره

## إنا سنبقى مواليك بالروح سيدي نفديكا

نلطم صدرنا ونذكر إبكّل لطمّة صدرك  
من ساوته خيل آل أمية ويه ظهرك  
وكلما تألمنا ذكرنا شلون صبرك  
لمن وقعت إعلى الوطية يا حما الدين  
نلطم وعين الفاجعة تهمل دمعها  
ونعزي فيك الزهرة ونهون ضلعها

نبكي وكلّ يواسيكا      بالروح سيدي نفديكا

ما نملك إحنا سيدي كله صفى لك  
طلقنا هالدنيا ونطمع في نواك  
والله يبو السجاد منفارق جمالك  
نهواك ياللي تربوا منك الخدين  
ما خاب والله من تمسك بيك ما خاب  
آمن وفايز من يدفنونه بالتراب

في كل يوم نناديكا      بالروح سيدي نفديكا

عبدالمنعم مرزوق

هذا نداء محبيكا - الليالي الاولى - عزاء المعامير - عبدالمنعم مرزوق - 2012

**16 نوفمبر 2012**